

摘藻堂四庫全書薈要

集部

欽定四庫全書薈要卷一萬六千三百五十二

集部

道園學古錄卷二十五

應制錄五

元 虞集 撰

碑

大龍翔集慶寺碑

欽天統聖至德誠功大文孝皇帝自金陵入正大統建  
元天厯以金陵為集慶路使傳旨行御史臺大夫阿斯  
蘭哈雅命以潛龍之舊作龍翔集慶寺云明年召中天

竺住持禪師大訢於杭州授太中大夫主寺事設官隸  
之畫宮為圖授吏部尚書王僧家努往董其後斥廣其  
地為民居者悉出金購之土木瓦石丹堊金碧之需財  
自內出不涉經費工以傭給役弗違農有司率職庀工  
景從響應御史中丞趙世安承稟於內行御史中丞伊  
實棟阿呼圖克哈雅相繼率其屬以益之吏敏於事民若  
不知材既具期以明年正月甲子之吉迺建立焉其大  
殿曰大覺之殿後殿曰無量壽佛之殿居僧以致道者

曰禪宗海會居其師以尊道者曰傳法正宗之堂師弟子之警發辨証者曰雷音之堂法寶之儲曰龍藏治食之處曰香積鼓鐘之宣金穀之委各有其所繚以垣廡闢以三門而佛菩薩天人之象設纓蓋牀座嚴飾之具華燈香樂之奉與凡所宜有者精備以稱上意焉賜姑蘇腴田以飯其衆上在奎章閣親詔臣某製文勒石以誌之臣聞金陵之虛自秦時望氣者嘗言有天子氣至藏金土中以填之其後若吳晉宋齊梁陳南唐之君長

據以為都會然皆瓜裂之餘僅克自保不足以當王氣之盛夫孰知江山盤踞之固天地藏閔之久積千餘年而有待於我聖天子之興也不然何淵潛之來處遂飛躍之自茲見諸禎祥行事昭著之若此者乎夫太陽之升麗於天光耀熙赫高深廣袤之區生成動植之類孰不受其煦燠而其次舍之所經知天者必仰推而志之天子以四海為家莫非聖明之所臨鑒惟帝運之所由起天人應合之機實在於此其可忽諸今天子建極於

中撫制萬國顧懷昔居勢隆望重非我佛世尊無量之  
福孰足以處乎此也茲寺之成上以承祖宗之洪庥下  
以廣民庶之嘉惠聖天子之至仁大慈垂示乎億萬斯  
年者於此可見矣嗚呼盛哉敢拜手稽首而述讚曰

明明上天祚我皇國聖祖神宗立我民極於昭武皇懋  
建丕績憲章修明民用齊飭天下為公仁廟受策治極  
而圯或斲彝則乃睠明哲是保是翼俾久而安弗遐以  
逝祝融效靈海若率職更相吉土此維與宅吉土維何

建業舊邑龍依崇丘虎立磐石昔有居者不稱厥德惟  
我聖皇天命攸迪川寧於波田宜於穡民用孝敬神介  
景福帝命不遲師武臣力遂開明堂受天之厯廟而祖  
饗郊而神格治功告成庶物蕃息江流湯湯經我南服  
中城有宮皇所肇迹惟時父老載慕疇昔雲來日臨庶  
我心懌皇帝曰嘻予豈汝釋維大覺尊寶相金色常以  
惠慈拯汝迷溺我即我宮作祠奕奕照汝淨月沐汝甘  
澤汝見大雄如我來即馬寶象寶貝金珠璧凡為汝故

我施毋惜無苗無害居佛之域民庶稽首我不知識我  
願天子聖壽萬億與佛同體住世有赫一誠報恩有永  
無斁

大承天護聖寺碑

惟皇上帝監觀萬方爰啓聖神俾一遐邇時惟太祖皇  
帝神武維揚作興帝業世有濬哲秉鉞誓征粵世祖皇  
帝建茲民極用輯大成既有九有戢兵包甲禮修樂宣  
神祇咸若敷一本以端統樹羣文以定分秩序有經萬



世永賴成宗顯承法令較一我武考受命撫軍歸纘歷  
服保育民物既庶既富豐亨豫大如日方中迨至延祐  
至治之間重熙累洽物大而盛弗虞儉壬間數彘憲於  
是欽天統聖至德誠功大文孝皇帝德合天人之助躬  
修揖遜之節武以勘定文以宣昭忠孝率職姦慝擿伏  
雨暘以時年穀順成寶興於山海波不揚嘉靖寧一利  
澤長久頌聲交作度越古今列聖之仁恩神靈之景貺  
布濩旁達湛漬駢駘於斯時也有歛福錫民之志焉固

皇極之道也乃託諸制作之宏祠享之盛於以表奉先  
之孝於以廣濟物之慈同仁之化不亦與天地合德矣  
乎天曆二年歲在己巳春三月皇帝若曰予承宗廟之  
重君臨天下夙夜兢慎思所以上繼祖宗下安民庶者  
不敢少置也矧予昔在沖幼太皇太后躬保持而導迪  
之欲報之德亦不敢少忘也稽諸佛氏之書孝莫重於  
報親慈莫廣於及物而吾佛之所以陰相我國家者豈  
可量哉汝太禧宗禋使伊埒布哈中書平章明埒棟阿

大都留守張錦結努其為朕度地以作梵刹稱朕心焉  
四月上幸近郊觀於玉泉之陽謂侍臣曰層岡複巘隱  
隆西北太湖之浸汪洋滄涵峙而東高甕山在焉旁薄  
扶輿固祇園之地也使太史眎之曰吉秋八月晦立隆  
祥總管府以領之鑄銀為印秩正三品以臣伊埒布哈  
領府事將作臣額穆爾蘇為達嚕嚕齊國語達嚕嚕齊官  
屬之長也臣錦結努為總管上曰建寺而不先正其名  
民將因其地而稱之其署題曰大承天護聖寺又曰寺

所以嚴奉祀事而屢氓雜居則幾乎瀆矣買旁近地得  
十頃有奇皆厚值以予之分賜從臣俾為休沐之邸侍  
祠而至則處焉且命其總管府臣相大田以買之度其  
歲入以為僧食明年上受尊號改元至順十月上命太  
師臣雅克特穆爾率百官詣寺所告諸后土之神始命大  
匠治木闕月命中書右丞臣實迪為隆祥總管府達魯  
噶齊益以省臣重其事也二年四月十六日始作土功  
治佛殿基得古金銅之器於地中多事佛之儀物實有

密契者云寺之前殿寘釋迦然燈彌勒文殊金剛手二  
大士之像後殿寘五智如來之像西殿度金書大藏經  
皇后之所施也東殿度墨書大藏經歲庚午上所施也  
又像護法神王於西室護世天王於東室二閣在水中  
坻東曰圓通有觀音大士像西曰壽仁上所御也曰神  
御殿奉太皇太后辟容於中日有獻月有薦時有享器  
用金寶曰壽禧殿上齋宮也諸宿衛之舍畢具九月上  
諭臣錦結努曰朕之建寺非徼福以私朕躬也昔者國

家有佛祠之建金帛穀粟一出於國之經費受役庀徒則民與兵官府供億並緣為奸非朕意也今茲役也工傭其直物償其價勿使有司因得以重困吾民臣錦結努頓首受詔而退鳩工以集事材木甃瓦丹漆設色必精必良其土宜交易得所稱事出傭藝各奏能施無遺巧人樂效力若子趨父屬樞密儲政兩院臣請以所領軍就役而給錢如民則軍士亦被惠矣從之凡役軍四千三百人留守臣言寺有行宮天子之所齋也嚴重不

敢褻請以所領匠將作而給錢如兩院之兵亦從之十月十五日上覽而悅之陞隆祥總管府為隆祥使司秩從二品命太禧宗禋使臣鴻和爾布哈臣實迪臣額穆爾蘇大司農臣錦結努為之使他官與次俱升又作東別殿柁木別殿丈室講堂衆沙門之居會食之所碑亭并亭庖湑庫廡門垣橋梁咸稱觀美凡規制皆圖以獻而上親臨定焉皇后出大慶禮賜白金從戶部易鈔四萬定及割田賦之在荆襄者以資之三年寺大成於是名

五臺山萬聖寺釋師惠印特賜榮祿大夫司徒主教於  
寺有勅命臣祖常臣集臣法洪臣惠印製文以刻諸碑  
臣等既同奉詔乃相與言曰惟昔有國家者秘祝不私  
其身而思錫諸民史臣書之後世誦之今聖皇之心一  
出仁孝瑣瑣之秘祝詎可擬倫哉且其為役可謂大矣  
財出內帑而不傷於外府役以傭錢而不勞於兵農官  
有專任而不煩於有司欽惟聖上怡神穆清對時育物  
量準天地而一日萬幾睿知明達而慮周天下至若斯



寺之落成也營度經始之勤治辨董正之任考圖攻位之審其簡在帝心又有如此者豈非億萬世宗社生靈之福哉敢再拜稽首而獻文曰

於赫皇祖聖神立極歷世繼承照臨維繹維我聖皇孝思如在視民如傷博施廣愛具曰大雄等慈能仁導善閔惡以救我人乃作大刹於國西郊檐屋翬翼霧雨之交金玉寶物筭同河沙曰予有祈世不謂多飛蓋樹幢香鬘珠網聖靈與俱來即來享福我惠我遂我煦養子

孫黎民均視同仰思我太母為世遠思顧復之勤孫謀  
是貽肅肅徽音邈邈令儀眷予晤懷庶其來茲相彼流  
泉閣於水涘人神翊扶天子至止鼓鐘鼎彝嘉樂宴喜  
多壽多福又多男子羣臣百工侃侃獻功民無勩勞府  
乃羨充樂石刻辭頌言雖雖億萬斯年贊於皇風

河圖仙壇之碑

今上皇帝以特進上卿吳公全節年七十用其師故開  
府儀同三司神德張真君故事命肖其像使宰執贊之

識以明仁殿寶而寵之。賜宴於所居崇真萬壽宮。近臣百官咸與大合樂。以饗。盡日迺已。既拜。賜公坐於承慶之堂。名門人弟子而告之曰。吾在髫鬣。志翔寥廓。稍長。學道弱冠。從先師謁世祖皇帝。遂留不歸。五十年間。以天子之命。祀名山大川。東南西北。轍迹咸至。一遇泉石之勝。輒旁皇而不可得。而我父母被寵光。封鄉國高年。偕老時。優詔使歸。為壽。而我曾不晨夕在側。吾終身之不安者也。今老矣。為我圖地。必吾父母之塋。是近庶體。

魄有所依焉則我之志也小子識之於是命弟子歸饒而求之明年得地於安仁縣去饒國公之墓左數百步其山曰河圖之山書以圖來公嘆曰吾昔聞諸異人云河圖八卦也今人所傳河圖蓋五位相得而各有合之圖也儒家頗駭其說然即卦以指視先天位數吾得金吾之旨焉故宋江東謝公枋得得其說而隱去世祖力致之在道不食數十日而神氣益完迫授以官迺化去吾受其書而藏之今得山曰河圖告我之兆久矣迺命

作石壇據風氣之會將以栖神焉則又歎曰予平生以泯然無聞為深恥每於國家政令之得失人才之當否生民之利害吉凶之先徵苟有可言者未嘗敢以外臣自詭而不盡心焉而恩賚之厚際遇之久則非人力所能至者矣其從子集賢待制善竊知公之意錄其平生之事畧已成編會善卒公得其書而感焉乃遺書江南以告集曰吾蚤歲猶得見國朝諸大臣及宋之遺老逮其中年公卿之重士大夫之賢且仁者無一人吾不見

焉覽觀四方逝者如水知心之友其文可以傳者莫若  
清河元復初氏而云亡亦已久矣區區之迹他日將何  
所托乎人生不可期相望數千里子必為我著仙壇之  
記使千載之下猶或於此乎知之則亦故人之情也夫  
迺為次第善之所錄以遺之云吳氏系出太伯為吳子  
之國子孫散處吳楚間多以國為氏其在番者為番君  
番之吳皆宗番君矣其居安仁有龍坡居士諱岳者墓  
在桂溪前倉之曾源其高大父也世居壽櫟山屋於磻

石之上故宋咸淳己巳有泉出東楹之礎潤液之脉理直如貫繩上升梁間達乎西楹迺生靈芝光彩映日久而不壞是歲十一月七日公生丹光盈室生七月而能言其父抱膝上因坐假寐夢神人告之曰高仙托體君家塵中不能留也四歲能誦詩七歲其叔父教之日記千言十歲從其兄遊乎仙巖之下慨然有遺世之意十三學道信州路桂溪縣龍虎山太上清正仙宮之達觀堂堂之尊師李君宗老嘗有異徵得公而應焉臨川有

雷空山先生者隱居種湖之上深明易老以其所學著  
為成書公往師焉他從學者莫之能及也李君避舍延  
至雷先生而公得以專受其業雖休沐不出每得新瓜  
果之屬必即以歸獻其親無有曠闕十六度為道士於  
其傳系則居何君恩榮之次國朝初得江南嗣漢二十  
六代張天師宗演入朝張公留孫在行奉勅留禁近始  
賜名上賜其後位特進開府儀同三司玄教大宗師者  
也至元十四年作崇真宮以居之二十四年開府徵公



至京師公辭其親別龍坡君之墓新墓田之舍以行是年得入見二十六年奉詔祠南嶽二十八年奉詔從開府徧祠嶽瀆諸山川二十九年賜崇真宮於浙西公奉詔宣諭江浙行省三十一年成宗皇帝自朔方還纂大統公從開府率其屬北迎召見賜公古瑯玉蟠螭之環一有旨設醮於上都壽寧宮五晝夜公專主章奏特勅命公每歲侍從行幸所司給廬帳車馬衣服廩餼著為令元貞元年制授公沖素崇道法師南嶽提點二年奉

詔祠中嶽淮瀆南嶽南海大德元年奉詔祠后土西嶽  
河瀆江瀆二年制授沖素崇道玄德法師大都崇真萬  
壽宮提點三年太上清正一宮災公奉旨與近侍馳驛  
命江浙省臣更作之公請與宮之人各以私財佐有司  
之不及四年命有司作三清殿及觀門廊廡於崇真宮  
設醮慶成上齋而臨幸賜開府及公黃金白金重幣有  
差五年公奉旨召嗣漢三十八代張天師與材過揚州為  
守臣禱旱雨至京師為達爾罕丞相哈喇哈遜王禱旱又

雨八年公父母年皆七十奉旨降御香於江南諸名山  
賜對衣尚尊為其親壽於齊老之堂九年作崇真觀於  
安仁縣賜名曰萬壽崇真觀十年制授公江淮荆襄等  
處道教都提點十一年武宗皇帝自朔方歸纂大統制  
授公玄教嗣師總攝江淮荆襄等處道教都提點崇文  
弘道玄德真人鑄銀為印曰玄教嗣師之印視二品封  
其父克己翰林學士中順大夫至大元年以歲歉禁民  
間酒特勅光祿寺日有賜尊上賜公七寶金冠織金文

之衣為朝真之服仁宗皇帝在東宮所賜冠與衣貴重  
華異如上所賜公從駕至中都中秋錫宴上顧其貂裘  
弊改賜黑貂三百以為衣縷金文之錦以為祿二年制  
授公弟子夏文泳元成文正中和真人江淮荆襄等處  
道教都提點賜銀印視二品三年公奉聖旨設醮於龍  
虎閣皂角曲三山制贈公大父鑑昭文館大學士資善  
大夫追封饒國公謚文靖祖妣陳氏封饒國夫人父翰  
林學士克己加授榮祿大夫大司徒饒國公母舒氏饒

國太夫人仍賜對衣上尊有旨命公奉贊書歸鄉榮其親因命設醮於安仁縣之崇真觀以慶成皇慶元年仁宗皇帝命設大醮於大都南城長春宮公奉旨投金龍玉簡於嵩山濟瀆是年勅翰林學士元明善修龍虎山志者序進又改賜崇真觀額為崇文宮延祐元年公奉旨設醮於龍虎閣皂甸曲三山因請歸慶其父母八十之壽對衣尚尊之賜如初是年傳旨江浙行省促公還朝制授公弟子毛穎達正德弘仁靜一真人嗣掌遁甲

之祠事賜銀印視二品四年有旨名其鄉曰榮祿鄉里  
曰具慶里降璽書護其家六年饒國公之訃至上京集  
賢以聞勅翰林侍讀學士元明善著碑文翰林學士  
承旨趙孟頫書字太子詹事郭貫篆額給傳奔喪十一  
月太夫人歿十二月葬父母於其縣崇德鄉之山田作  
明成觀以奉祀明年召還京師英宗皇帝至治元年十  
二月開府張公觀化於大都崇真宮上聞有旨歸其喪  
於龍虎山百官送諸上東門外所過有司治辦舟車祭

遣公請歸職喪不許命弟子宗玄沖道明復真人陳日  
新薛玄義奉喪還二年制授公特進上卿玄教大宗師  
崇文弘道玄德廣化真人總攝江淮荆襄等處道教知  
集賢院道教事玄教大宗師王章一一品銀印一總攝  
道教事二品銀印一并授之勅省臺百司諭以傳宗之  
事而大護其教用開府之志作東嶽仁聖宮於齊化門  
外重修太延福宮三年太上清宮又災公率其屬更作  
之泰定元年春長春掌教真人闕上用公薦以汴梁朝

元宮孫公履道主之二年公奉旨設大醮於長春宮又  
設大醮於崇真宮護教之詔如故事制贈饒國公光祿  
大夫大司徒謚文康三年奉旨設醮於龍虎閣皂白曲  
三山奉勅葬開府張公於南山之月嶠作仁靖觀以奉  
祀四年改造開府所建溪山真慶宮天曆改元冬公還  
自上京明年北迎明宗皇帝謁見之次賜對衣上尊及  
歸天曆護教之詔如故事追封故開府張公曰神德真  
君勅改仁靖觀為神德宮至順二年公進宋儒陸文安



公九淵語錄世罕知陸氏之學是以進之有旨設醮於  
長春宮公告老請以弟子夏文泳嗣玄教詔留公三年  
有旨設普天大醮於長春宮又設大醮於崇真宮元統  
元年今上皇帝即位護教之詔如故事仍改至元之元  
年京師旱公奉勅禱之雨冬無雪公奉勅禱之雪三年  
公重建饒州芝山文惠觀於永平門外遷番君之神以  
居之四年與神德宮明成觀皆被璽書之賜五年畿內  
田有蟲蝻執政請公禱之三日盡除而仙壇之成則在

六年矣皇元初有中原五嶽之四在天子封內既得宋而後南嶽之神得而禮焉是以世祖特命開府張公領其祠至是屬諸公矣長沙有故宋相趙信公葵之子淇博學多識尤好神仙金丹之事有宜春李先生簡易者故玉溪李觀諸孫遇異人得丹道蓋以為遇劉海蟾而得之淇每師問焉未盡其旨而李先生化去後遇之玉山道中始得其說既內附命為湖南宣慰使輒欲棄官行其道憂患多故不能如其志公為天子使南嶽道過

長沙趙公見而敬焉曰神氣沖爽而有福德可以受吾道迺焚香密室出其書以授之則皆海蟾玉溪之秘云世祖嘗曰天子當禮五嶽而朕年高不能往每遣近臣忠信而識察者分道祠嶽瀆后土戒之曰神明之使馬不至喘汗則善矣蓋歸而問其所聞見人物道里風俗美惡歲事豐凶州縣得失莫不參伍以周知踈遠之迹焉公之連歲被命而出每辭以為臣不足以當大事之重上曰敬慎通敏誰如卿者遂行他日成宗遣嶽瀆使

還顧問如世祖故事曰卿過郡縣有善治民者乎對曰  
臣過洛陽太守盧摯平易無為而民以安靖上曰吾憶  
其人即日召拜集賢學士公使過浙西時故翰林學士  
閻公復為按察使老成文學譽望甚重公時才踰弱冠  
議論明正閻公客之不敢忽也後閻公居翰林益加重  
焉成宗既崩仁宗皇帝在懷孟未至而閻公典詔令有  
狂士危言以訐閻公事罔測公力言諸李韓公孟仁宗  
意解及武皇即位遂以平章政事歸老高唐如世祖待

王鹿庵磐故事朝廷得敬大臣之體不以口語傷賢者則公深有以維持之也故翰林學士吳公澄始用董忠宣公士選薦於朝自布衣拜翰林應奉召至不拜去後又名為國子監丞升司業與時宰論不合又去公啓於集賢貴人曰吳先生大儒天下士聽其去非朝廷美事集賢貴人聽公言起奏吳公為直學士吳公雖不赴而天下翕之至元大德之間重熙累洽大臣故老心腹之臣莫不與開府有深契焉至於學問典故從容裨補有

人所不能知而外庭之君子魏冠褒衣以論唐虞之治  
無南北皆主於公矣若何公榮祖張公思立王公毅高  
公昉賈公鈞郝公景文李公孟趙公世延曹公鼎新敬  
公儼王公約王公士熙韓公從益諸執政多所諮訪闕  
公復姚公燧盧公摯王公構陳公儼劉公敏中高公克  
恭程公鉅夫趙公孟頫張公伯純郭公貫元公明善袁  
公楠鄧公文原張公養浩李公道源商公琦曹公元彬  
王公都中諸君子雅相友善交游之賢蓋不得盡紀也

薦引善良惟恐不及憂患零落惟恐不盡其推轂之力  
至於死生患難經理喪具不以恩怨異心則尤公之所  
長也公博覽羣書徧察羣藝而於道德性命之要粹如  
也嘗作環樞之堂畫先天諸圖於壁以玩心神明有詩  
曰要知顏子如愚處正是羲皇未畫前其所造益如此  
故其述作光明痛快足以見太平之盛而深存忠厚於  
人倫有所感發自幼至老尤好吟詠皆出其天性之自  
然而非有所勉強尤識為政大體是以開府每與廷臣

議論及奏對上前及於儒者之事必曰臣留孫之弟子  
吳全節深知儒學可以備顧問是以武宗仁宗之世嘗  
欲使返初服而置諸輔弼焉道家醮設之事是其職掌  
故於科教之方無所遺闕香火之費無所簡吝然而朝  
廷耗費過重則每日事天以實不以文弭災在於修德  
而禱祈特其一事爾全真之教叙其祖傳有所謂玄風  
慶會錄者大德中嘗使人譯之而莫達其意有旨命公  
論定公曰丘真人之所以告太祖皇帝者其大槩不過



以取天下之要在乎不殺治天下之要在乎任賢修身之要在乎清心寡欲煉神致虛則與天地相為長久矣譯者如其言奏之上大感悅不惟丘公之心事明白而太祖皇帝聖學之淵微亦從可窺其萬一是以君子深有慨於公之言也公之執親喪也自奔喪至家水漿饋粥僅足以延息涕泗滂沲繼以血衄喪葬之後力之所得為者無不盡其力焉山田之域伐石江濱山為洞穴掘泉下錮深廣高厚葬之日郡守王公都中親助喪事

送葬者連數郡車馬畢至時方寒雨濘淖載途一夕北風結凍堅冰在地行者無苦人以為孝思所感也明成觀有著存閣者以致其嚴祀之意方外之士感其孝思知慎其親之存歿自此始矣其事開府也先意承志周思廣慮所以事朝廷尚道教無絲毫可所違拂開府泰然委之而不疑確然信之而不惑所以能有立於聖世者非惟運數則然而其誠心相孚亦有致之也其葬開府於南山也饒信撫三郡守將以其官屬會葬江南

諸名山之主者皆來竣事伐石題名而退擇卜之慎營  
繕之勞工力之博賓客之盛東南數十年間未有能彷彿  
其萬一者公之盡力於其師與所以奉其親無二矣  
久之作南山諸詩沉鬱哀慕識者讀而感焉東南道教  
之事大體已定於開府之世而艱難險阻不無時見於  
所遭裨補扶持彌縫其闕使夫羽衣黃冠之士得安其  
食飲於山林之間而不知公之心力之罄多矣公之宗  
系別居於達觀堂者尊顯獨隆於他支封真人者凡數

十人奉被璽書主宮觀者尤不可勝紀其姓名別有述  
公平生畫像之贊及大父母父母與其身之所奉被贊  
書及諸堂室記頌皆一時名筆別類為書曰天爵堂類  
編并其所為詩文曰看雲錄者通若干卷集賢直學士  
揭傒斯奉旨作序以傳於世皇上即位之初親御翰墨  
書閑閑看雲四大字題曰賜吳上卿識以明仁殿寶勅  
御史中丞馬祖常太常歐陽玄為之贊至元六年九月  
初一日大駕自上京還次懷來燕坐幄殿集賢大學士

布達實哩等以上卿之言入奏曰御書四大字臣全節  
既刻諸樂石又模勒於文梓為四鉅榜塗以黃金周以  
雲龍之飾以其二賜崇文宮閣而度之請錫名曰龍章  
寶閣又以其賜達觀堂先朝嘗賜玉璞命攻玉之工擬  
太上說經之像刻數年而後成請以歸之達觀閣而祠  
之請錫名曰玉像之閣而御書二榜揭諸其上矣有勅  
命臣某為之記而文惠觀河圖仙壇并命臣某銘之臣  
某先已記仙壇之記如右謹再拜稽首奉詔而為之著

銘曰

嶷乎茲山厥名河圖地闢天開孰究始初則圖示卦庶  
聖歷述山藏無聞傳者周易易老之通同原殊宗或隱  
或彰闕在道宮有崇丹丘仙壇是作玄契夙符龜筮從  
若門人弟子作之三年天子致問有責其園清靜佐理  
啓自神德維帝外臣歷世無斁在今宗師有為有文孝  
親敬師致忠於君寵光道家冠代邁古白髮蒼顏長侍  
帝所遺老故臣沛然從游紀德論交金石不渝量弘智

周用世何有却而不居有相其道天子聖明昭惠老成  
龍章鳳書玉質金聲有懷故鄉有棟有宇神明攸居山  
木翬舉盛德孔容象其粹冲聿嚴敬共以報顯融有嘉  
豐草呦呦鳴鹿天降甘露濯濯神穀維昔廣成宅乎空  
同千歲不衰穆其清風肅肅吾壇圓方平直竒耦參兩  
俯仰有則修名度方天子命之刻祠孔貞來者敬之

道園學古錄卷二十五

謹案卷二十四第一頁後一行博綽舊作撥徹今

改後放此 後二行阿婁罕舊作阿刺罕今改

後放此 二頁前五行塔本舊作塔拜又默呼

舊作滅烈又托端庫庫倫舊作脫端濶濶倫今

並改後放此 前八行扎拉台舊作扎刺兒台

今改 後四行和爾齊舊作火而赤今改後放

此 三頁前三行庫克楚胡土克圖舊作闊出

忽都禿今改 後四行伊埒巴延布拉克舊作



永黎伯顏孛剌今改 後四行阿勒達爾舊作

阿藍歹兒今改 後六行實默圖舊作昔門禿

今改 後七行達爾丹舊作旦耳答今改 五

頁後五行拜姓舊作拜降今改 八頁後一行

奇珠舊作乞住今改 十一頁前四行圖固勒

舊作禿忽刺又蘇魯克舊作薛靈哥今並改

前七行布克罕舊作卜古可罕今改 前八行

伊嚕勒德濟舊作玉倫的斤今改後放此 後

二行格呼勒德濟舊作葛勵的斤又博哩博哩

特舊作別力跛刀答今並改 後三行騰格哩

哈達台舊作天哥里干答哈今改 後四行和

哩達噶舊作胡力答哈今改 十二頁前二行

和卓舊作火州又伯什巴里舊作別失八里今

並改後放此 前三行鄂端哈實哈舊作兀敦

甲石哈今改 前五行巴特瑪阿勒坦德濟舊

作巴而木阿而忒的斤又伊都呼舊作亦都護

今並改後放此 前七行伊埒阿敦舊作也立

安敦又哲伯諾延舊作者必那顏今並改 前

八行哈瑪爾蘇爾坦舊作罕勉立鎖潭今改

後一行尼沙布爾舊作你沙卜里今改 後二

行伊嚕格勒齊德濟舊作玉古倫赤的斤今改

後放此 後三行茂瑪勒德濟舊作馬木刺的

斤今改 後五行和濟格爾德濟舊作火赤哈

兒的斤今改後放此 後八行布思必舊作卜

思巴今改 十三頁前一行阿濟克舊作阿只

吉又鄂囉齊舊作奧魯只今並改 後一行伊

埒伊克默色必吉舊作也立亦黑迷失別吉今

改 後三行巴克巴噶爾舊作巴巴哈兒今改

後四行哈密勒舊作哈密力今改 後五行

努爾德濟舊作紐林的斤今改 後七行布爾

罕舊作不魯罕今改 後八行本布徹爾舊作

八卜义今改後放此 十四頁前一行圖沙瑪

舊作脫思麻今改 前六行七行烏爾戩阿南

達舊作兀刺真阿難答今改 後一行恰克嘉

舊作錢吉今改後放此 後二行多爾濟斯滿

舊作朶兒只思蠻今改 後六行納木達實舊

作喃答失今改


卷二十五第一頁後六行伊實棟阿舊作亦釋董

阿又呼圖克哈雅舊作忽都海牙今並改 五

頁前八行明埒棟阿舊作明理董阿今改 後

六行額穆爾蘇舊作阿麻球今改後放此  
十  
三頁前八行哈喇哈遜舊作哈刺哈孫今改後  
放此  
二十二頁後一行布達實哩舊作不荅  
失利今改





總校官庶吉士臣張能照

校對官檢討臣龔大萬

謄錄監生臣杜成



欽定四庫全書叢要

集部

道園學古錄卷二十六

七

詳校官助教臣謝登雋



欽定四庫全書薈要卷一萬六千三百五十三

集部

道園學古錄卷二十六

應制錄六

元 虞集 撰

醮文

水陸會功德山

我國家聖聖相承深仁厚澤浹於人心累洽重熙多歷  
年所今上皇帝濬哲文明纂承大業好生之德已洋溢  
於萬方恭已之誠思貫通乎上下海涵春育無間幽明

雨順風調大同遠邇聖恩盛大茂以加矣而萬幾之密  
猶垂念於隱微九有之師或未該乎冥邈勝修法會式  
究淵衷乃脩水陸冥陽大齋于萬壽寺自三月一日啓  
建七日滿散乘法寶之威光成金心之願力旃蓋香華  
種種妙饌齋儀梵唄一一圓成凡我佛子昔自多生歷  
酬定業或以刀兵水火或以疾難飢荒沉迷五濁之惡  
塗未返一真之本性遇良因於今日得勝妙之現前渴  
饑並獲於清源苦惱悉超於極樂來生佛土祇奉明時

回向善提增崇聖壽臣等迺稽首而作偈曰

聖上運大慈憫諸有情等作此大勝會供養佛法僧勇  
識妙蓮華諸大阿羅漢畢支迦五明金剛大威德護法  
諸龍天凡在虛空界敬禮等無二開闢諸方隅光明悉  
照耀迺至諸明哲往昔善持世四生及六道凡在苦趣  
者悉皆承佛力來赴於道場心花得發明諸識轉為智  
一切現苦業消滅無復續巍巍大功德皆由聖心起我  
聞昔有人積寶如須彌持施得福多恒河沙難喻我皇

勝妙因福報不思議視彼施寶者千萬不及一我等佛  
子衆各生慚愧感稽首贊吾皇聖壽千萬歲與佛共悠  
久

水陸會緣起文

原夫一靈圓妙本不昧於昏迷歷劫無明遂有淪於流  
轉我佛興大憫念開方便門譬彼宵征遠道冥行荆棘  
之林我以慧炬照之則前進無殊於白晝又如往濟大  
川忽遇風濤之險我以慈航渡之則安行無異於陸途

施平等於無方悉垂拯拔嗟幽沉之有苦尤切哀矜於  
是目連感定業而生悲觀音化面燃而啓教十方諸佛  
共弘應供之名六道四生亦攝菩提之海大士仰承於  
佛勅道場肇建於當年孤峯接雲海之空明白日映江  
潭之澄澈神靈交會凡聖混融分八位上下之殊作萬  
劫圓通之施傳流既久證驗尤多我今上皇帝與佛同  
心如天之覆念生成之類已在於鈞陶而冥邈之蹤尚  
迷於出沒迺鑒人天之意大脩水陸之儀爰命國師俾

提法要廼以三月一日於大都萬壽寺脩建水陸無遮  
法會七晝夜上資善逝之恩光下拯孤寡之陰昧香積  
普熏於世界盡斷惡緣妙蓮應現於池中悉離苦網咸  
來佛會共沐帝恩逍遙極樂之鄉不墜輪迴之境共報  
聖明君乃說偈以贊曰

一切衆生皆具佛性如摩尼珠五色隨映如何累劫業  
識相因無明展轉生死根塵我佛慈悲施方便力如大  
醫王救彼痼疾餓者令飽渴者與漿幽闇與明熱惱與

涼况爾六道諸苦隨業不藉佛恩何由自潔聖皇在上  
運大仁心樹旛慧幢立功德林作此道場期七晝夜平  
等無碍均一高下光明圓滿如佛現前孤幽沉寃懽喜  
慶筵如是勝因增崇聖壽億千萬年堅固悠久

建國醮建壇青詞

荷天洪休膺國大統肇惟元祀奉若明禋殊庭修秘祝  
之嚴肅拜候景光之集伏願環紫壇之納陞闢黃道於  
叢霄天極旋樞日星炳曜后祇薦祉川岳闡珎用期泰



定之民均被豐成之賜

朝詞

聖祚在躬肇啓乾元之歲道宮修禮丕昭荅貺之誠禱  
以涵三鑒茲精一伏願乾元統御坤道順承時對春陽  
導本支之鬯達紀增神策保宗社之尊安遂以生成均  
陶動植

三清

荷天地之洪休晉承繼序奉祖宗之成憲思究彌綸期

敬達於丹誠惟謹資於立教肅將蠲潔用極依歸伏願  
慶衍中朝仁儲大本休明佑啓百神受職以安寧福祚  
延洪萬世奉天而長久

昊天

入膺丕緒有命自天載省眇躬無疆惟恤啓淵衷之至  
實感真貺於太虛伏念比屬盛時俄慨堅冰之早辨永  
懷讓德不忘暎日之初心迺正誼以廓清期與民而寧  
一用發憂兢之慮悉紓對越之恭伏願乾御陽剛坤成

地道祖宗陟降同保佑於高明家國治平丕顯承於悠久

后土

集基命於眇冲始建初元之紀覽幅員之廣袤益思大業之興祇若寶圖誕敷金錄伏願玄功有造至德無為道致謹於順承協成泰定物資生於厚載保合乾剛

醮星祝文

太陽

赫赫太陽秉陽之精照臨天下運我皇明克循克軌永  
底隆平

太歲

翼翼倉龍集於巽維紀綱百神運行四時相我君道壽  
我皇祺

歲后

於赫歲陽配於陰宮承於大君內治之宗以生以成登  
我歲功

金星

奕奕長庚煌煌啓明主我兵事宜順其經弗僭弗忒邦  
家以寧

太陰

明明太陰配陽麗天主國之刑勿忒其躔以順以寧于  
以永年

室宿

惟乾之維是為營室炳耀定中景命有翊廣開天門相

我無極

天罡

龍角在田帝居所持聖人之生次舍在斯攝提衆星萬  
壽是基

病符

歲德所紀主病有符視其祲祥傍射在隅於赫景命靈  
其祲除

大耗

歲有癘神耗之大者集于乾隅衝照辰舍乃謹祓除勿  
害純嘏

土星

煌煌鎮星位于中宮行地無疆承天之功用集嘉福懿  
範是崇

小吉

鶉首之舍月后所臨東井洋洋景耀昭森扶我元懿萬  
福來歆

喪門

左挾丁符右接坤隅孰敢啓門當我吉居祈祓不祥以  
寧皇輿

金星

太白之精其神孔武憶我南西孰祓孰禦宜歛其祆勿  
間多祜

九月十四日高昌王大夫傳旨作醮星文

元辰天罡



於惟聖皇受命于天斗車提綱龍見天田萬物振羨威  
信是宣以介景福樂只萬年

羅暎

赫赫有威惟天之首日月之行交道豐蔀烜兮照臨景  
命先復克相有道天子萬壽

室宿

熒熒營室天之玄宮以藏以息肅肅雖雖乃瞻元台惟  
茲是從錫福未央如定方中

小吉元辰

位南以西爰即于坤東井洋洋有漑其源肅肅中宮景  
命在垣元吉之福既昌以蕃

太陽

赫赫太陽曰躋于乾順德維坤承暉弗愆昭光播和若  
春在暄萬福來臨與天齊年

參宿

載瞻參墟明星煌煌乃占其書孝謹忠良肅肅中宮景

命溥將儷于聖明既壽永昌

太衝元辰

有嚴太衝維震之宮青陽載熙木德乃通時維聖子景  
命是逢導之太和被之仁風

太陽

日之行天至尊以光誰其承之維青之陽輝輝煌煌繼  
照四方星輝月輪永保無疆

斗宿

斗為天機日月耀芒酌量政事褒進賢良於維聖子元  
台是當錫福自天欣欣樂康

太陽

東望扶桑赫乎九芒下被萬物麗天為章東賓西饒靡  
朝敢忘錫我景福於昭輝煌

太白

肅將金行司天之刑順軌出入厥有常經掠於軒轅占  
者以告敬恭用崇景福來報

軒轅

粲粲軒轅黃龍之體属于内廷占者所紀長庚來干非  
順之軌載崇載禳轉作多祉

太陰

占象于坎受陽以光配於大明流輝四方天清地寧軌  
道有常介我景福萬壽無疆

太歲

歲維昭陽辰在協洽神君所臨萬靈來合皇皇景祚奉

德秉法我將我享嘉佑斯荅

白虎

於菟耽耽為允之神為素為刑莫之敢嬰迎祭于西為  
禮孔殷神其食之介福來臻

大耗

滿庭之過神則害兮從而虛之孰可賴兮占歲之行厥  
有恒所尚易其齋豐我多嘏

迎神

肅肅靈臺三光下臨旨酒牲牢嘉幣吉金肅將祀事罔  
敢不欽赫赫洋洋神其來歆

送神

靈臺有享神具來格其祥如雲其近如日嘉禮告成景  
貺秩秩相我寶祚於萬千億

醮星祝文

迎神

肅肅清臺厯象是司維天有神維土有祇爰潔牲幣以

禱以祈歲祀奉迎靈其鑒之

太陽

出乎暘谷升乎榑桑麗於中天照臨下方愛而燠煦畏而滄涼戚畹有禱降福穰穰

太歲

煌煌明堂歲君攸居位于鶉首殿乎坤闈東井洋洋土德之基錫我嘉福順我禱祈

歲后



歲德至尊歲后配之黃裳元吉象服是宜理其內教以  
佐無為沁園有禱卻除病菑

勝光

陰之始生實自於午於卦為姤柔順斯主皇有懿戚元  
辰麗焉是用禱祠惠我安痊

土星

中黃正炁維土之神神氣上騰煌煌向晨元辰有宮其  
光來燭鑒于戚邸悉茲多福

婁宿

維主之生誕彌其月  
遡其元胎在魁之揭  
其宿維婁光耀熒熒  
除我疾疢安康毋越

病符

六氣不齊庶疾乃生  
維其司之有神孔明  
執其靈符以佐歲行  
禱以嘉薦惠我安寧

金神

五行之中金主肅殺  
有神孔威司是嚴伐  
歲行遇之伊

怒孰過享我忱禱毋敢凌越

灾殺

沴氣所生曰能致灾以殺為名不亦暴哉和以嘉醕柔以嘉脯順而好生永錫多祜

喪門

白馬素車人寔忌之孰啓其門有神蒞之上帝好生爾獨何為攝而憐心安我戚闈

五鬼

五氣之歸其名為鬼紂而弗伸有繁厥類載以酒漿道以車船既享而除勿為禍愆

青龍

星有角尾其象維龍蜿蜒蜿蜒東方之宮木德司春為善為仁永錫嘉祥百祿是臻

白虎

昂畢之上其象維虎有虺其武在西之澣金德是司為義為刑尚斂其威美疾用寧

送神

陽主于德陰主于刑刑歛德揚陟降在庭既享既歆以  
安以順神還應遲福以時進

醮星祝文

迎神

欽若昊天觀象知微爰即靈臺秩祀惟謹大庖既享大  
尊既盈神其格思來享克誠

太陽

東望扶桑赫曦來升羣陰既伏萬國咸承朝賓暘谷昇  
禮斯在齋宮告誠綏祿萬載

太歲

煌煌歲君臨於端門有烜朱方歲德攸存當離之明如  
日斯赫降爾嘉祥以輔有德

天罡

蒼龍之墟左為天田神蛟應龍景命所躔斗為帝車惟  
罡是指相我有道來錫繁祉

小吉

維鶉之首土德是毓是為吉神厚德嘉福宮壺嚴嚴景  
命所臨徽柔懿恭式薦其欽

功曹

寅為人統其方析津肅肅青宮盛德惟仁煜煜箕尾保  
我景命克長克安以輔明聖

歲星

盛德至仁所主為歲長養生成福祿攸系煌煌景光臨

照有方一人以寧萬國彌昌

羅睺

明離有神維南是司承其餘光劔戟孔威其威孔揚其  
福亦厚來降來享作我嘉祐

太陽

明兩作離繼照四方赫其有輝照我青陽青陽有煒百  
福來委俾熾俾昌以承天子

太衝



木德之盛次於震方至仁應規以佐青陽迺錫嘉福以  
暢元氣帝后萬年本支百世

太白

長庚之精司兵司刑煜煜其輝輔日而行斂爾光芒順  
爾軌度以安以寧佐我昌祚

熒惑

赫赫炎炎揚光於天孰當其鋒奮烈莫前維國有道宜  
順軌則順行為福以相有德

歲后

黃裳元吉以順為則佐於歲君豐阜民物靈臺有祠敬  
恭禱祈陰陽理和百福是宜

青龍

東方蒼龍至仁至靈角尾之間赫乎明庭青旂蒼玉禮  
祠維肅蜿蜿蜒蜒來降景福

白虎

兂為白虎至雄至武其德為金威怒執禦白旂素車象

德以旂風其從之百祿是宜

送神

成象於天降靈於地國有令儀克致禱祀禱祀敬恭神  
歸匪遲天子萬年福履綏之

金籙普天大醮青詞

建齋詞

績述丕圖恪奉祖宗之訓導迎景貺永綏家國之基奠  
輯福于眇躬暨息菑于中壺垂象每懷於示儆祈年尤

切於好生伏願慶衍宸闈祚隆繼嗣乾和保合三光全  
而寒暑平坤厚順寧五穀熟而民人育

祈嗣密表

祇荷鴻休肆膺神器念祖宗之付托思民社之依歸重  
惟繼嗣之隆實繫本根之固敢嚴秘祝用格高穹伏願  
錫祚慶圖申受上天之貺儲祥寶系益崇萬世之基

皇后保安密表

寅奉上穹申言中壺克相憂勤之念每嬰疾疚之虞莫

導嘉祥用綏福履伏願高辰鑒格正氣宣通天清地寧  
保太和而合德家齊國治均厚福以資生

建壇詞

奉丕基以臨萬國于今有年類上帝而徧羣神肇修秘  
祝仰輯溥天之慶俯將率土之誠紫壇森列於人文丹  
闕昭回於象緯伏願天垂甘露地發醴泉靈風受職以  
周旋道氣成章而鬯達永符至順孚佑皇元

第一日旦朝祭皇天后土三界萬靈上資宗祧先

聖凝神冲漠垂祐邦家祝延睿筭保固丕圖中闡  
齊年本支繁衍

月律應時卦極正陽之盛天根開景氣升清旦之初通  
變闔於雷風妙流行於山澤均承主宰咸赴禱祈伏願  
聖祖神宗陟降洋洋而在上皇天后土卑高秩秩以分  
儀迺發禎符用隆寶曆延齡維永尚期婉德之同錫美  
有輝更應多男之祝

午朝祭日月星宿祈日月齊明星辰順度

離為日坎為月瞻陰陽交易之機天應星地應潮察上  
下盈虛之候儼宸居之伊邇望晷景之方中敷宣藥笈  
之文朝步琅霄之境伏願赫曦繼照煌煌旁燭於萬方  
素曜並明肅肅順行於九道帝車臨制四序成功雲漢  
為章五緯咸若副此乾乾之兢惕錫予郁郁之嘉祥

晚朝祭五嶽名山祈社稷尊安宗藩輯睦風俗醇  
厚百辟忠貞

觀符瑞而告功升中斯在出雲雨而及物望秩攸崇巖

巖民庶之具瞻肅肅天真之下治即秘祠而用幣及初  
夕以飛章伏願方嶽奠封靈祇受職宗藩輯睦永綏磐  
石之安風俗清淳長被喬雲之覆

第二日早朝祭聖帝明王先農后稷消穰水旱蟲  
蝗祈五穀豐稔民物阜康

繼天立極亶惟上帝之聖神開物導民實贊無為之化  
育道秉機緘之秘教興衣食之餘功叙九歌業隆萬世  
藉白茅而明薦望素履於虛皇伏願無聲無臭以作孚



鑒此小心之昭事不識不知而順則密符大德之好生  
民風馴致於雍熙國祚誕膺於長久

午朝祭風雲雷雨祈風調雨順寒暑應時

鼓以雷霆潤以風雨彌綸功用之神求諸形體原諸性  
情主宰玄元之造觀萬物散殊之迹知兩間旁薄之仁  
無為而成有相之道日麗端門之景雲開秘笈之科伏  
願天德潛符歲功咸遂九農百穀無旱乾水溢之虞四  
海羣生享安靜和平之福庶釋憂於宵旰用和惠於春

秋

晚朝祭四海四瀆祈山川定位海宇清寧

一元合氣乘風澤於洞虛百谷來王出淵泉於溥博首  
五行而善利潤萬物以資生貨殖用興舟楫以濟稽古  
玄圭之錫沈兹蒼壁之章伏願地平天成府修事治玉  
書保運制衝瀆之洪波寶穡宜年動滿盈之甘澤民安  
居於樂土國養德於長源漸被所同旁薄無外

第三日早朝祭三洞四輔經錄傳教宗師祈百神

效職臣鄰忠孝國祚延長

太元結氣冥思浩劫之初妙有垂芒朝徹延康之上參  
贊化生於物始傳流神寶於人間保昌運以長存握真  
符而不宰將輯簡穰之福茂陳敷落之篇伏願乾歷開  
天坤瓊闡地種民在宥颺言清靜之風景命溥將相協  
玄同之造忠言彙進道德彌光

午朝祭左社右稷城隍社令祀典神祇祈民樂太  
平物無疵癘兵寢刑措疫癘潛銷

秦社之土五色重嘉穀之屢豐方澤之樂八成致幽祇  
之畢出帝命作九圍之式神靈會萬國之封力扶玉虜  
之安寅奉璇霄之降伏願泰階昭晰坤道順寧物阜民  
康無疵癘札瘥之害兵寢刑措皆生聚教養之時以至  
永年並依玄造

晚朝祭九壘土皇幽陰主宰資度忠臣義士兵死  
橫亡六道四生俱登道岸

禮樂鬼神信顯幽之一致生成變化知闔闢之無私即

昭明焄蒿之間布風雨霜露之教三光攸燭九夜斯煌  
伏願帝命平招天陽來復玉袍犀甲禮余忠義之魂瓊  
簡羽章起厥幽沈之趣羣類並躋於道岸泰和庶協於  
明時

散壇

五時列祠曄曄紫壇之燿火九宮飛步雍雍碧落之空  
歌備成終節之朝敷散瑤華之景玄科有誠至敬無文  
伏願陟降在茲達玄黃之玉氣福祿來下生丹碧之芝

英普與羣生恭承嘉惠

設醮詞

三清

奉承寶位對太上之顯光保佑眇躬罄淵泉而忱禱肅  
清璿館修設金科伏願元氣絪縕冥風舒鬯室家祚胤  
膺福壽以咸宜宗社臣民荷禎祥而均慶

玉帝

維天與祖宗既全畀付自身而家國悉有禱祈爰啓真

科用干洪造伏願鑒觀儆懼孚佑眇冲保和宮壺之安  
錫羨本支之盛至于臣庶共樂生成

星主

星環次舍仰瞻天極之尊氣斡陰陽妙宰帝車之運景  
光來下秘祝用陳伏願司命紫微自中宮而錫福儲祥  
寶系率下土以蒙休

天皇

坤拱神圖妙秉萬幾之會坐臨華盖旁分六甲之司歲

祀殊庭承禧穹宇伏願抱極樞而環照皆占至順之祥  
奉天一以尊居增授泰元之筭

后土

奉若柔祇配皇天而立極統臨廣寓宅吉土以升中為  
國有祈維靈斯荅伏願羣生成遂九有奠安亥乙親祠  
綏保徽音之嗣黃流用裸燕貽翼子之謀

至順二年十二月二十三日祭星常國公奉旨命撰

祝文



迎神

灑灑圓穹三光昭明四方八維柔祗利貞蜡通百禩歲  
事告成犧尊多儀來享克誠

天罡

天眷萬方篤生聖明受命溥將攝提建貞天田之上左  
角所經蒼龍致福萬歲咸寧

羅睺

受天明命百靈翊扶旁燭有光赤燦之餘首乎天經形

隱弗舒戟爾矛戟迎祥帝居

室宿

河有天源木貴天根帝命降社元台為尊定之方中煌煌焯焯推而祀之萬福之門

弔容

昊天成命如日斯照運行推移載占其小有容冠素適據隅兆祝而祓之易號以笑

小吉

乾以天健坤以地厚鶉首之墟土德孔阜肅肅中宮元  
命昭祐六五黃裳元吉之繇

太陽

日以像君月以像后陰承陽輝萬福備有晨光熿融晝  
景煥明以壽以安以生以成

參宿

參墟耀靈土德長生台息其和發為滋榮正位居體西  
南利貞培本長源萬福來成

金神

中宮土德位南之西太白流英挾威以躋雄毅肅嚴戈  
鋌利犀尚革而從降福孔皆

太衝

煜煜青陽震雷之門玉兔肖類蒼龍儲恩帝胄天錫景  
命翊元東望孔祠扶桑載暎

太陽

肅肅紫微前星有輝上承天光仰接日儀煦煦為春明

明在時陽德粹純品物咸熙

斗宿

星回于紀斗臨漢潢璧合珠聯三辰齊光震夙元台肇  
此青陽司中有神源深流長

白虎

木性東榮金行兌勝刑德之交史謹其徵於菟耽耽負  
隅若闔率義從仁祈報斯稱

病符

六氣之邪孰執其契歲行神從臨午之位青陽占運適  
與之值祝以移精安和允濟

太陽

靈臺有祀報本主日仰瞻陽光步我濬哲歲周星回天  
序有秩牲幣敬共嘉惠申錫

太歲

日月次周成我歲功百神具來羣蜡畢通明堂嚴嚴盛  
德容容享我報祈以興嗣豐

青龍

龍有天德維木之仁大明生東獻歲發春時而淵潛時而奮申施惠自天至于庶民

歲后

赫若歲陽其配在陰以肅內治以保中臨丁女癸妃其從如林通幽達微鑒德以歆

送神

神來如雲神惠如雨彌天映日惠澤周普歲行維新秩

祀咸舉相于皇明永作神主

黃籙溥天大醮清詞

建壇詞

厯念先朝悵神遊之日遠言修秘祝導靈氣之時升闢  
玄景以通誠建紫壇而經始伏願懸珠空境扶玉方輿  
風馬雲車順陰陽而陟降龍章鳳篆舉幽顯以鈞陶

第一朝回薦皇朝宗廟列聖神儀

肅肅在廟永懷予劔之遺濯濯厥靈恒若羹牆之見爰



資神筴用導英儀伏願列聖齊臨萬真環拱寅賓出日  
返往駕於中天妙合迴風發化機於厚地

第二朝回薦皇朝列聖

企仰山陵想音容而永慕顧瞻霜露感時序以增哀爰  
即紫壇奠廸玄馭伏願天健其行而無息日窮于次而  
又新神氣昭明式慰臣民之望景光旋復更貽胤祚之  
安

第三朝回薦皇親國戚一切靈儀

藩屏國家實屬本支之盛沈淪泉壤每傷幽顯之殊溯  
璇宇之流光迴銀潢之逝水伏願會陵絳闕受煉朱陵

闕

星辰還復生民之始

闕

永承丕

祚之隆

第四朝回薦后妃公主嬪御靈儀

禱禴在御歷思儷極之尊車服充庭徧念穠華之盛慨  
生存之弗永致薦悼以惟勤伏願施德自天資生繇地  
性靈不昧聿宣幽滯之懷運祚無疆仍會聖明之樂

第五朝普薦勲臣宰輔文武官僚

追懷神聖脩殷薦於曾霄爰念臣鄰閱英姿於厚壤俾  
偕膺於金錄庶仍從於瓊輿伏願受日之光承天之佑  
圭璋濟濟眊王國以並生明典昭昭秉民彝而不昧

第六朝普度兵刑橫死男女衆寡

內修外攘寧免兵刑之用上征下暴更深泉壤之悲拯  
無告於重陰寔有資於大造伏願天光旁燭地氣昭升  
斷者續死者生頓釋幽關之故想病者愈憂者樂永為

化國之新民

第七朝普度普天率土兆姓羣生苦爽窮魂幽靈  
等衆

國家每念於生靈則修治道體魄或淪於苦趣更轉化  
機啓勝會於今晨廓迷塗之宿業伏願陽開陰闔天施  
地生執錄把符仰至真而得度葆和正性圓大化以長  
年

第八朝專為和安天地調順陰陽保國寧家康民

阜物

存順沒寧極幽明而無憾往禪來續妙化育於不窮宣  
金籙之玄文保蘿圖之景運伏願乾坤毓德日月垂光  
列聖在天共敷恩於祚胤一人有慶永錫福於臣民

第九朝昭謝皇天后土岳瀆山川陰陽主宰

天佑邦家揔基圖於九有日臨海宇妙樞紐於羣生仰  
三景之高居罄一忱而昭謝伏願降年有永錫福無疆  
凡在臣鄰咸保忠貞之節庶幾民物常依道德之光

解壇詞

肅肅紫壇既備九朝之禮煌煌金錄益增列聖之光熙  
事告成誠心孚格伏願神隨天運福被坤輿瑞日祥雲  
常麗曾霄之景太山磐石永隆萬世之基

設醮詞

三清

天眷基圖列聖繼守成之緒時因歷數先皇成猷代之  
期敢緣追遠之初心普致闡幽之忱禱伏願開明三景

敷落五文九轉成真既備生神之妙百靈交鬯復還象  
帝之先仍錫壽祺并祈康阜

玉帝

昔扣玄穹導近親之神識遙臨素幄致大寶於嗣君乃  
陳秘籙之科溥濟幽關之趣伏願昭宣天德旋復氣機  
陟降帝傍九族逍遙於金闕經綸宇內羣生成遂於縣  
圖申錫長年永依妙道

后土

基圖鞏固每資厚載之功體魄歸藏謹候昭升之氣降  
璇宮而來享鑒金籙之敷宣伏願效法成能資生有道  
超神太極齊日月於中天合景至陽綏子孫於下地

東極

先皇獸代因軫念於幽局上帝好生爰禱祈於東極奠  
瑞光之遠逮引羣識以俱超伏願甘露溥林慈雲就日  
丹輿寶蓋並從妙道以高居玉厯金符永鎮生民之極  
樂



風伯祝文

東朝有命祗肅元壇上帝鑒臨萬靈率職咨爾風伯塵  
路惟清戢暴扇和熙事用成急急如律令

雨師祝文

咨爾雨師灑道是司和陽散陰相成祝釐

皇后修設黃籙大齋齋意

言念宗親將薦誠於既遠遽罹大故屬在疚之方深肆  
嗣皇繼序之新申前日籲天之實普超幽爽咸濟生靈

伏願道妙無方真游如在升九霄之神氣行億載之昌  
圖九圀化工並承德施

正薦位白文

言念先朝列聖帝室懿親蚤遺體魄於人間思導神明  
於天上鼎湖弓墮俄興臣妾之悲丹闕禮成既得基圖  
之托及燕休於長樂申祈禱於太清惕然霜露之寒恍  
若風雲之會龍儀虎衛陽光照灼於朱陵貝闕珠宮明  
水激揚於東井願金支之並濯與玉氣以俱升穆穆乎

秉德以肅雍洋洋乎在帝之左右輯和九族驩娛還若  
於生存旋歷曾霄感爽頓忘於凝滯返至真而無外與  
造化以為徒况王政施仁必先無告而太鈞播物何間  
有生更推滄海之餘波徧及幽關之苦趣妙機所運道  
化同超明則復為人亦我聖神之賜歛而錫之福庶乎  
寬大之恩嘉與明時共躋壽域惟天地日月合德合明  
保子孫黎民能安能久

孤魂榜

生死者晝夜之常汝勿認昭昭靈靈之識坎離者乾坤  
之用吾以開生生化化之基茲者清朝稟承慈極尊尊  
而思逮於凡下親親而念及於幽遐導揚列聖之法筵  
普惠重泉之苦趣如茲良會實號希逢汝孤寡等昔受  
天地之降衷其初皆善各累形氣而逐物以妄為常貪  
者徇財烈者徇名忿則如山慾則如澤極沈淪而愈降  
恣飄蕩以忘歸因根接塵隨境生解為寒冰為湯火皆  
其一念之差為鬼蜮為豺狼遂入萬殊之變原其名數

何可歷陳我是以廣太上之好生推妙嚴之濟衆酌黃  
華於東井蕩爾形骸耀丹治於南宮陶其靈質宿業不  
存於故想化機更造於新成不溺不焦爾可以見本真  
之不昧能流能焰爾可以驗道氣之常行承茲三景之  
開明即詣諸天而受度更無退轉並樂超升

正三門

華蓋北瞻天帝座蓬萊東擁道家山

啓玄殿

只尺天光開玉府萬重道氣見金容

正薦位

雙鳳駕雲開輦路羣龍環日護天香

揔真殿

春當霄漢三台貴朝步星辰四輔尊

萬法宗壇門

綠章封奏通三景絳節趨朝引萬神

殿後西門

玉殿受釐春意滿竹宮拜貺景星明

北斗殿

慶雲郁穆承天闕景緯昭回共斗樞

殿後東門

仙音縹緲鸞凰合神衛森嚴虎豹閒

景曜殿

三光合景扶元氣五緯齊明報德星

寥陽殿

五文結篆開天極九氣生神象帝先

朱陵府

九華曲盖迎司命七寶芳林主好生

齋厨

金鼎蟠龍甘露溢玉芝成象大庖盈

齋堂

報聞千歲蟠桃熟約取九霄飛佩來

焚郭



莫就此間存活計便教向上得光明

祭風伯文

維風有神在巽之位地附天而不墜持舉於中陽旋陰  
而時行扶搖直上今則至尊有禱上帝來臨伏願宣靈  
氣於八門穹祇翕合卻飛塵於九地宇宙廓清

祭雨師文

恭承帝命祇祀雨師出雲氣於山川彌綸瓊闕濯天章  
於河漢飛洒玉都今則肇起玄壇導迎法駕伏願六龍

調馭順和協於陰陽萬物潤滋肅澄清於天地

長春宮祈福保安齋意

上天眷佑長貽宗社之隆至道冲盈式衍邦家之福屬  
偶嬰於疾疚爰謹事於禱祈伏願聖鑒昭回祥光旁燭  
身逢康泰暨中壺以平安運協壽昌與多方而寧謐

青詞

治平之運仰荷洪庥疾疚之生敢忘沈禱爰命羽衣之  
士敬敷寶笈之科伏願五帝儲華三光協德身康疆而

逢吉有永壽祺國清淨以無為均蒙福惠

崇真宮祈福保安齋意

丕承付託仰資天地之和祇有啓居偶感陰陽之沴喜  
遘臻於康復爰謹致於禱祈伏願輯福上躬錫禧中壺  
前星炳煥協家國之尊安景貺熙明及臣民而定壹神  
明垂祐丕顯隆平福履愆和偶嬰疾疢敬祠琳宇備蕙  
琅科伏願景貺來臻壽祺永錫康強逢吉式承宗社之  
安化育成功長荷乾坤之造

祭海神文

潮失故道犯我鹽官有司捍防民力既殫閱歷歲時靡  
漬茲害浙郡多下恐就淪敗民實何辜不德在予相臣  
來言交修用孚乃勅中外悉智展力相爾有臣亦克受  
職我土既固民生底安六府治修報祀萬年

祭伍子胥文

爾以忠殞主潮于吳潮今為灾吳其沼乎爾其揚靈具  
訓海若俾安其常毋作民虐既止既安民遂有生爾作

明神永有令名

大龍翔集慶寺正殿小上梁文

伏以龍光有赫象教方興式嚴前殿之崇祇奉祇園之  
勝上棟下宇方締構於良工細栴大亲並具材於貞榦  
成規斯在願力維弘伏願天相聖心佛加神運百重闌  
楯移來天上之慈雲萬歲山河永鎮人間之福地

後殿小上梁文

兜率化宮移來地上梵天新刹示現人間坐延衆佛之

臨殿有四阿之制鉤心闔角先崇締構之宜審面飭材  
已具經營之素式觀地架儼若天成伏願龍象翊扶鳳  
皇翔繞丹青金碧赫然佛日之輝黼黻文章永著皇風  
之盛

大龍翔集慶寺正殿上梁文

伏以虎踞龍蟠即淵潛之佳地雲興霧涌建梵釋之新  
宮巍巍中正之居赫赫大雄之座欽惟欽天統聖至德  
誠功大文孝皇帝惟天為大如日之升經綸既正於洪

規崇信不忘於願力美矣善矣大成舜帝之箭韶經之  
營之匪為文王之臺沼我佛有護國救民之助吾皇示  
報功崇德之心黃金滿布於祇園華構上移於兜率式  
崇大殿爰舉脩梁相我工人陳茲善頌

拋梁東

日上扶桑散曙紅  
鹿苑珠璣涵曉露  
鍾山草木動春風

拋梁西

石城突兀護江堤  
舊遊曾見羣龍舞  
望幸猶聞六馬嘶

拋梁南

蒼龍曾此卧江潭風雲會合千峯一

山谷傳呼萬歲三

拋梁北

瞻望帝星臨萬國山川誰為地東南

形勢只知天咫尺

拋梁上

白玉毫光千萬丈吾皇還似覺皇尊

龍象人天皆拱向

拋梁下

亦有幘幪千萬厦彌天法雨本無私

滿月明珠寧有價



伏願上梁之後皇基鞏固紺宇尊高紀億萬年共祝聖  
神之壽遍大千界同沾殊妙之恩萬歲萬歲萬萬歲

後殿上梁文

伏以浴日九淵現禎符於鍾阜承天八柱建名剎於冶  
城爰開方廣之筵用祝周阿之殿欽惟欽天統聖至德  
誠功大文孝皇帝清明有鑠故舊不遺鷺起新河萬斛  
綵舟之容與鳳歸天闕七重寶樹之檀藥九轍跡之所  
臨宜珠光之共護脩梁肇舉善頌斯陳

拋梁東

萬丈紅光接寶宮古佛昔來龍繞座

高僧時謁錫飛空

拋梁西

長安日近碧雲齊但依具闕瞻龍象

即是鸞輿慰耄倪

拋梁南

千年王氣現優曇浴龍池水皆功德

擁日山峯盡翠嵐

拋梁北

上意每憐江樹碧紺宮留鎮國南門

華蓋瞻依天北極

拋梁上

紫蓋紅雲春蕩漾  
舉頭見日庶民心  
思佛思君同一想

拋梁下

慈雲恩雨均沾灑  
三年以至萬斯年  
長樂昇平承福嘏

伏願上梁之後皇風遠播佛日同輝  
四字八荒揔被覺  
慈之化億靈萬載永歌帝力之加  
萬歲萬歲萬萬歲

道園學古錄卷二十六